

Tun M dedah kaedah pemikiran

Pengamatan, ilmu pengaruhi cara bekas Perdana Menteri berfikir

Oleh Veena Rusli

KUALA LUMPUR: Tun Dr Mahathir Mohamad berkata, pengamatan berterusan terhadap persekitaran dan minat mempelajari mengapa sesuatu tindakan diambil, adalah antara perkara utama mempengaruhi corak pemikirannya.

Menjawab pertanyaan pada sesi dialog 'Seminar Pemikir' di sini semalam, bekas Perdana Menteri itu secara berseloroh berkata, jenis makanan yang diambilnya tidak mempunyai kaitan dengan cara beliau berfikir.

"Saya makan semua... mi goreng, mi siam, kuetiau sampai kadang-kadang sakit perut. Makanan Cina, India, Mexico, Jepun, Barat pun saya makan, semua itu tak berkait dengan cara berfikir.

"Saya lihat bangunan di Eropah masih kukuh walau dibina 300 tahun lalu, maka dari situ saya pelajari mengenai perlunya kita berfikir jauh ke hadapan dan bukan membina sesuatu untuk kegunaan zaman sendiri semata-mata... itu sebab kita bina KLIA (Lapangan Terbang Antarabangsa Kuala Lumpur)," katanya.

Seminar dua hari itu dianjurkan

Pusat Penyelidikan Universiti Islam Antarabangsa Malaysia (UIAM) dan dirasmikan Presidennya, Tan Sri Sani Junid.

Dr Mahathir turut mengingatkan semua pihak tidak menganggap diri sebagai serba tahu sedangkan ada orang lain lebih berilmu.

"Apabila kita rasa tahu semuanya, kita tak pandang orang lain dan kita tak akan berjaya. Tiada guna menyuruh orang menghormati kita kalau kita tak ada apa-apa... macam mana nak suruh orang pandang ting-

gi pada kita kalau kita di bawah.

"Kita perlu bercita-cita tinggi dan bekerja keras untuk mencapainya, barulah kita akan dihormati dan tak perlu kita suruh, mereka akan lakukan (hormati) sendiri," katanya.

Terdahulu ketika menyampaikan ucap tama bertajuk 'Pemikiran Seorang Pemikir,' bekas Perdana Menteri itu berkata, tiada salahnya untuk meniru kejayaan pihak lain seperti Jepun yang mampu membina semula negaranya selepas musnah akibat peperangan.

Bila saya pergi ke mana-mana, saya bukan sekadar memerhatikan segala yang ada tapi saya juga amati dan saya fahami"

Dr Mahathir Mohamad
Bekas Perdana Menteri

